

March  
2016



Vol VII No. 1

# KRISTIAN THALAI

KRISTA  
TANA  
DANGLAM  
NGAM

Kristian Thalai Pawl Chanchinbu thla tin chhuak



Bial KTP Conference & Golden Jubilee lawmna - Hlimen Bial



Bial KTP Conference - Lawngtlai Chanmari Bial



Selam Branch KTP Diamond Jubilee



Bial KṚP Conference - Hortoki Bial



Bial KṚP Conference - Darlawn Bial



Bial KṚP Conference - Tuipang Bial

## *Kristian Ṭhalai Pawl chanchinbu thla tin chhuak*

1970-a chhuah ṭan ■ Kum 46-naa wawi 3-na ■ Chhuah tawh zat : 449

**Editor :**

Lalmuanpuia

**Joint Editors:**

C. Laldingliana

Upa K. Rorelkima

V. Lalrinmawia

Vanlalpeka

**Manager :**

R. Lalramnghaka

**A lak man :**

Kum khatah – Rs. 60.00

Copy khat – Rs. 5.00

*Thu chhuah tūr nei chuan Editor,  
Kristian Ṭhalai, Synod Office-ah thawn  
tūr a ni a; a la duh chuan KṬP Office-ah a  
man pèk lâwk a ngai.*

**Office Phone : 9436142398**

**E-Mail :**

[kristianthalai@yahoo.com](mailto:kristianthalai@yahoo.com)

[centralktp@gmail.com](mailto:centralktp@gmail.com)

### KRISTIAN ṬHALAI PAWL

**Thupui**

Rawngbawl tūra chhandam

**Thupui inngahna**

Ephesi 2:10. Thil ṭha ti atán  
Krista Isuaah chuan siama awmín,  
ama kutchhuak kan ni si a, chu thil  
ṭha tih chu kan awmna tūrin  
Pathianin a buatsaih lâwk a ni.

**Thiltumte**

1. Isua Krista rinna leh amah anna  
kawnga ṭhalaite hruai.
2. Kohhran kut ke ni tura ṭhalaite  
buatsaih.
3. Kohhran hnathawh tihpuitlin.
4. Krista Chanchin Ṭha puan  
darh.

## A CHHUNGA THU AWM

- |  |    |
|--|----|
| 1. Editorial   | 2  |
| 2. Krista Chanchin Ṭha puan darh   | 3  |
| 3. Pen khat chauh  | 8  |
| 4. Khawvel danglam zela Mizo Kristian ṭhalai   | 10 |
| 5. Pathiana inngah   | 14 |
| 6. <b>Work Camp report :</b>   | 16 |
| Tlabung Chawnpui   |    |
| Noxa Ramthar   |    |
| 7. <b>Sunna</b> – Tv. Hmingsangliana   | 20 |
| 8. <b>Hringlang tlang</b> – Mipa naupang thilpek   | 21 |
| 9. <b>Hriselna</b> – Taksa vawn fai  | 23 |
| 10. <b>Rimawi</b> – Mass Media-a fakna hla hmanga rawngbawlNa<br>– Zai mite mawh leh hmasawwna tur | 24 |
| 11. <b>Kantu</b> – Kawrtethawveng Branch   | 28 |
| 12. Keimahni   | 30 |



*KṚP thiltum zinga pawimawh tak pakhat chu, 'Kohhran kutke ni tura ṭhalait buatsaih' tih a ni a, pakhat leh chu, 'Kohhran hnathawh tihputlin' tih a ni. Kan thiltum aṭang hian inen fiahna tur kan ngah hle aṭom e. Kohhran kutke tur ni si, inkhawm ṭhulh reng mai kan ni em?*

*Kohhran kutke tur ni si, inkhawm laia inkhel en leh programme dang insiam chawp ching kan ni mai em? Sam phuahtu chuan, Pathian biak in hung chhung kawtlaia ni khat aṭom pawh ni sangkhat aia a ṭhat zawk thu leh, khawi lai hmun emaw mai maia aṭom ai chuan, Pathian ina kawngkhar vengtu nih pawh a duh zawk thu a lo sawi a (Sam 84:10). KṚP member, piangthar inti si, Pathian biak in kan ngaina lo lutuk ringawt mai te, inkhawm rei kan hlau lutuk ringawt mai te pawh hi ngaihtuah tham chu niin a lang. Kohhran kutke ni tur leh kohhran hnathawh tipuitling tura koh, kohhran hnatlanga thawk ngai reng reng lo te hi kan ni em?*

*KṚP member, mi piangtharte zingah zu leh drug hi hnawk ber a ni kher lo. Kan intihhmuh ṭhin, ṭha lo tak nia lang chu inkhawm laia foolball khel en leh Korean film Mizo ṭawnga lehlin en kan intihhmuh ta lutuk hi a ni. Mizote hi intihhmuh ching tak hnam kan ni ve a, Pathian rawngbawlna min tisukuk thei zawng hi intihhmuh lovin, rawngbawlna hlen thei tur zawng thiltih hi intihhmuh ila a va hlu dawn em! Kohhran kutke ni tura pen chhuak peih reng reng lo ṭhalai, kohhran hnathawh tipuitling tura mite kṭkawoi peih reng reng lo leh, khawvel thil dang chṭak tlat ṭhinte hi kohhran hliamtu an ni thei a ni.*

*Sam phuahtu chuan, "Ngai teh, nangmah hlata aṭomte chu an boral dawn si a, A uiresantu apiang che chu i tiboral ta a," (Sam 73:27) a ti. Kan Pathian hian kan boral duh lovin min tlan mah sela, keinin kan duh lova kan hransan lui tlat a nih chuan kan boral tho tho dawn a ni. Kan ram leh hnam a boral lohva, kan kohhran a boral lohva, nang leh kei ngei pawh hi kan boral loh nan kan Pathian thu chuan **'I rawngbawlna kha hlen rawh'** tiin min ko a ni.*



## KRISTA CHANCHIN ṬHA PUAN DARH

– Pastor C. Lalramchhana  
Keitum

**R**istian Ṭhalai Pawl din chhan leh a thiltum zinga pawimawh tak pakhat chu KRISTA CHANCHIN ṬHA PUAN DARH tih hi a ni a. Hemi tihlawhtling tur hian Branch leh Bialten tirhkoh chawmna sum tuakin theihtawp kan chhuah ṭhin. Hei bakah hian missionary-a inpete hi ṭhalaite an ni deuh ber bawk. Heti chung hian he kan thupui hi i han zir Chiang Dawn teh ang.

### 1. Chanchin Ṭha kan tih hi eng nge ni?

Chanchin Ṭha kan tih hi a bul chu Pathian hmangaihnaah a inṭan a. Pathianin ama anpui ngeia a siam mihring, suala tluchhe tawh leh chatuan hremhmuna tla mai tur a lainatna leh a hmangaihnaah a inṭan a ni. He thu hi a tichiangtu ber chu Johana 3:16-17-a kan hmuh – *"Pathianin khawvel a hmangaih êm êm a; chutichuan, a Fapa mal neih chhun a pe a, amah chu tu pawh a ring apiang an boral*

*lohva, chatuana nunna an neih zawk nan. Khawvel thiam loh chantir turin Pathianin a Fa khawvelah a tir lo, khawvel amah avanga an dam theihna turin a tir a ni zawk e,"* tih hi a ni. Heng thu aṅanga lo lang chu – Chanchin Ṭha (Good News) kan tih chu mihringte tana chanchin ṭha leh lawmawm êm êm chu a ni. Chu pawh chu mi tin ta tur, mi tin huap zo leh mi tin mil a nihna hi a ni. Heta 'khawvel' a tih hian a tum ber nia lang chu mihringte hi kan ni a. Tichuan, chanchin ṭha chu mihringte tana chanchin ṭha a ni a, Pathian thinlungah a awm a. "Pathianin min hmangaih êm êm" tihah hian tawp ta sela, mi tin tan chanchin ṭha a tling lo vang. Chu hmangaihna lo lan chhuahna, "chutichuan, a Fapa mal neih chhun a pe a, amah chu tu pawh a ring apiang an boral lohva, chatuana nunna an neih zawk nan," tih a tel hian kan tan chanchin ṭha a lo tling thei chauh a ni.

'Chanchin ṭha leh lawmawm' kan tih pawh hi mihring zingah hian a inruah lo thei hle a. A ṭhen an lawma an hlim hle laiin a ṭhen tan chuan lungngaihna leh thin tirimtu mai a lo ni ṭhin. Mahse, Lal Isuan mipui sangnga a hrai pawh khan, chhangper leh sangha kha an eiin an puarpui vek niin a lang a. Ei thei lo leh ei duh lo an awm lo a nih hmel. Pathian hnen aṭanga chhandamna leh nunna thuchah – Pathian hmangaihna thu leh a taka a Fapa mal neih chhun min rawn pek thu hi a dawngtu zawng zawng tan malsawmna thlent, nunna petu a ni flat mai a. Hnam leh vun rawng, hausa leh rethei, hmeichhia leh mipa, naupang leh puitling a thliar lo va. Mi tin ta tur a nihzia hi a dikin, a takzia pawh a lang zel a ni.

Tirhkoh Paula chuan, "*Ani chuan kan Pathian leh kan Pa rem tih zawngin tunlai khawvel sual tak lakah hian min chhanchhuah theih nan kan sualte aiah amah a inpe ta,*" (Gal 1:4) a ti a. He thu aṭang hian Lal Isua Krista kan sualte aia a rawn inpek hi Pa Pathian rem tih zawng tak a nih thu kan hmu.

Pathian thinlungah chuan mihringte hi kan pawimawh

ber a. Chhandam a tum pawh mihringte chauh hi kan ni a. Chatuan nunna nei tura a duh ber pawh ama anpuia a siam mihringte bawh hi kan ni. Chhandamna kawng, a hmanrua chu ama Fapa mal neih chhun a ni a. Pathian hmangaihna sawi turin Isua Krista chanchin tel lovin kan tan awmzia a nei lo. Mi zawng zawng hnenah chanchin lawmawm tak tak hrilh mah ila, Isua Krista tel lovin tu man chatuana nunna an chang dawn si lo. Chuvangin, Chanchin ṭha dik tak chu Krista chanchin ṭha hi a ni a; Isuan, "Kal ula, chanchin ṭha hi hril rawh u," a tih pawh kha ama chanchin tho hi a ni. Chuti a nih chuan Kristian Ṭhalai Pawlin kan puan darh ber tur chu Krista Chanchin Ṭha hi a ni e.

## 2. **Chanchin Ṭha dang a awmem?**

Tirhkoh Paula chuan Galatia rama mite hnenah khan, an hril ṭhin ni lo 'chanchin ṭha dang' awmin a sawi flat mai (Gal. 1:6-9). Chung chanchin ṭha dangte chu kan hril chanchin ṭha tihdanglam chawp niin a lang bawh. Chung hun laia zirtirna lar tak pakhat chu rinna avanga khawngaihnaa chhandam nihna ni lovin, "Ring mah ila,

Mosia dana serh tan, etc. kan tiha kan zawm tel loh chuan chhandam kan ni thei chuango lo vang," tih a ni ber.

Tunlai hian chanchin tha dang hi eng ang nge lo awm ta le? Ephesi 2:8-9-ah chuan, "*Rinna avanga khawngaihnaa chhandam in ni; nangmahni thawh chhuah a ni lo va, Pathian thilpek a ni; thiltih avang a ni lo ve, chuti lo chuan, miin an chhuang dah ang e,*" tih kan hmu a. Chanchin tha dang tih hian baptisma tih danah te, ni serh dik tum chungchang te, kraws rawng leh kohhran hming thlan leh nih dik tumna te, kohhran dik bik nih tumna te hi a ni tel em? Chanchin tha tihdanglam tumna hian sakawlh hriat dik tumna leh hlauhna min thlen mek te, inlarna dawng dik intihna avanga thim thuah hnihna hlauhna te, kohhran chhuahsan hi himna zawk nia inzirtirna thlarau te thleng hian a kaw em? Tirhkoh Paula chuan hetiang zirtirna leh a theh darhtute chungchang sawiin heti hian a sawi a ni – "Chu chu Chanchin Tha a ni ve si lo; nangmahni tibuaiin, Krista Chanchin Tha tihdanglam duh tute emaw an awm mai a ni a. Nimahsela, keimahniin emaw,

van atanga lo chhuk vantirhkoh pawhin emaw, Chanchin Tha kan hrilh che u lo kha chu Chanchin Tha dang reng lo hrilh che u sela, anchhe dawngin awm rawh se. Hmana kan sawi ang khan tunah ka sawi leh dawn a ni. Chanchin Tha in pawma lo kha chu, Chanchin Tha dang tu pawhin hrilh che u sela, anchhe dawngin awm rawh se," tiin (Gal. 1:7-9).

### 3. Krista Chanchin Tha chu engtin nge kan puan darh ang?

Puan darh dan kawng hi kawng tam tak awm mah se NGELNGHEHNA chauh hi han thlur bing ta ila.

1) NUNA NGELNGHEHNA hi puan darhna a ni. Hei hi a pawimawhin a tlo ber pawh a ni. KṚP-te hi kan zin zau hle a, sumdawanna te, eizawanna dang leh zirna avangtein Mizoram chung leh pawn, India ram pawn thlengin kan vak zau hle mai. Missionary hna – Gospel Track ken zela, ringlote hnena sem zel ang tluka pawimawh, a aia tlo leh thawk na thei chu kan nun dan hi a ni. Miten min han ena, Isua Krista ringtu thalai nun mawi tak an hmuh chuan, chu chuan kan hriat loh lai pawhin hna a thawk zui thlin a. Pathian

ram keimahnia awm chu dawidim angin kan awmna apiangah a ruk tein a thawk a. Chu aia Krista chanchin Ṭha puan darhna tlo leh pawimawh chu a awm lo. Krista ringtu nih hi a zahawmin a hlu a ni tih kan nuna kan lantir hian keimahnitan chakna leh nghehna min neihtir a. Mi dangten chu nun zahawm leh hlutna chu an lo chik a, kan rin Krista chu belh chian an lo chak ṭhin a ni. Mahse, kan khua leh kohhran kan chhuahsan veleha chu nun chu kan hloh nghal si chuan a tuartu chu keimahnibawkan ni a; min thlir rengtu kan bul hnaia miten kan rin chu engah mah an ngai si lo vang.

Fak hlain, "An chhinchhiah bik che, i chetzia an thlir, i sawi apiang an ngaithla," a tih ang khan, "Keia tan zawng nun hi Krista a ni," (Phil. 1:21) kan tih reng hi a ngai a ni. Paulan, "In awm dan chu Krista Chanchin Ṭha nen inmawi phawt rawh se," (Phil. 1:27) a lo ti bawk a. Amah Chanchin Ṭha neitu kan Lalpa Isua Krista ngei pawh khan hei hi a ngai pawimawh hle a niang, "In eng chu mi mit hmuhin eng rawh se; chutichuan, in thiltih ṭhatte an hmu ang a, in Pa, vana mi an chawimawi thei ang," a ti bawk

(Mt. 5:16). Chuvangin, ringtu nun ngelnghehna hi Krista Chanchin Ṭha kan puan darh theihna pawimawh ber a ni.

2) **RINNAANGELNGHEHNA** hi puan darhna chi khat a ni.

"Chanchin Ṭha in pawma lo kha chu, chanchin ṭha dang tu pawhin hrilh che u sela, anchhe dawngin awm rawh se," (Gal:1:7-9) tia Paulan a lo sawi ang khan, kohhran a din tirth aṭang khan tuna kan pawm leh kan rin bak chanchin ṭha dang a awm thei lo tih i hria ang u. Miten thiam takin kawng dang leh thil dang rawn hril mah se, Pathianin vantirhkohte hmanga lei mite a lo hriattir "mi tin ta tur Chanchin Ṭha lawmawm êm êm ka rawn thlen che u a ni" (Lk 2:10) tih bak Chanchin Ṭha dang a awm thei lo tih i hria ang u. Hman ata tun thlenga ringtute min tichiai fotu chu insawiṭhahna leh nih dik tum fal bikna thlarau hi a ni. Insawiṭhahna thlarau hi a Pathian thu lo va, eng ti kawng mahin chanchin ṭha a tling ngai lo. Mi, a rinnaa ngelnghet lo mi chu an thu leh hla miten an ngaisang ngai lo. Rinna kawnga tluk leh ding awn chung a nun hmang reng mi nunah tuin nge



beiseina nghat ngam ang? Tu man chhandamna kawng min hrilh turin kan beisei ngai lo a ni lawm ni? Kohhran pawn lam thu leh hla tuipui leh hluah thin thalai nunah tuin nge Krista chanchin tha thutak beisei ang? Kan rinnaah hian nghet taka ding kan nih hian chanchin tha chu puan darh a ni thei zawk a ni. Paulan, "...dik lohna ngamthlemna angin, fing verveka mihring bum chawpin, zirtirna thli tinrenga lehlam lehlama vawrh leh len len naupang kan ni tawh lo vang a, hmangaiha thu dik tak sawiin, engkimah amahah kan thang lian thei zawk ang: amah chu Lu a ni, Krista chu," (Eph. 4:14-15) a tih kha.

3) Kan puan darh hi kan TUIPUI LAM hi a ni thin. KṚP-te hian Krista Chanchin Tha ni lo hi kan tuipui lutuk palh ang tih a hlauhawm hle. Krista chanchin tha ni lo tuipuitute avanga kan invenna lamah hian, kan tuipui bertur Chanchin Tha thutak pensan khawpa hmanraw lam kan inlak khawla, buaipui loh tur zawk kan tuipui vaih chuan chanchin tha dang hi kan hriat lohvin kan chher tihna a ni mai dawn a. Paulan "anchhe dawngin awm

rawh se" a tih zingah kan lo tel ve reng mai dawn a ni. Chuvangin, kan tuipui tur ber Krista Chanchin Thaah hian i nghet tlat ang u. Kan fellowship item chi hrang hrangte hian a thlirtute hlimpui tur ringawt nge a tum a thlirtu leh ngaithlatu nuna Krista chawimawitir? Zu that lohzia tar lan tum hian zu ruih nuam tihna hmel a pho chhuak tha zawk ang nge a ti mektu nunah simna a thlen dawn? Mal leh group zaite hian mahni inpho chhuah rikngawt nge kan tuma ngaithlatu nuna Pathian hmangaihna hmuh fiahtir? Music tumtute hian style nge show kan tum music hmanga ngaithlatu leh thlirtu nuna van lam music ropuizia tar lan? Eng pawh ni se, Krista chanchin tha puan darhna kawng vek a nih avangin kohhran thalai tih awm, tih dan zahawm leh ngelnghet kan neih hi a pawimawh. Fellowship leh KṚP programme tin hi a ruka dik lo leh fel lote tana Krista Chanchin Tha dik puan darhna hmun a ni zel a. Mi dangte tan rinna kawnga ngelnghehna leh beiseina dik min kawh-hmuhtu leh min fuihtu a ni reng bawk.#

## PEN KHAT CHAUH

– H. Lalzawmliana  
Kolasib Venglai Branch

**M**ihring nunah hian thil tam tak a thleng a, inang lo tak tak te a ni hlawm th̄in. Mihring mizia pawh a inang vek hek lo, mi dang buaina kha ka buaina a ni ve lo thei a, ka buaina kha mi dang tan buaina tham a tling lo thei a ni. Harsa ti taka ka pal tlang hram hram th̄in kha mi dang tan eng tham mah ni lo, harsatnaa ngaih tur chi pawh a ni lo thei a, mi dangin rit ti taka an phurh th̄in kha ka tan chuan engmahlo mai a ni thei. A enga pawh chu ni se, harsatna a ni emaw, lawmna a ni emaw, eng pawh hmachhawn ila, a tawktu leh hmachhawntu tan chuan buaipui tham a ni hrim hrim a ni.

Mi tu pawh mai hian chhungrihlah zawhna inzawh th̄in kan nei theuh mai, chu zawhna pawh chu a inang vek lo, kan chhungrihlah hian chin fel duh leh zawhna chhanna nghah mek kan nei fo va. Chumi chhanna dawn tur pawh inang lo tak tak a nih a rinawm. A chin fel dan tur pawh danglam tak tak a ni ngei ang. Heng hring

nuna zawhna lo thleng th̄in te hian suangtuahna khawvelah min hruaiin, chu khawvelah chuan min chentir th̄in a ni. Chu chuan beiseina emaw, beidawna emaw a rawn thlen th̄in. Chhungril nuna buaipui tur lo thleng th̄in hian mizia leh chetzia, rilru putzia thlengin a ti danglam th̄in. Chutah chuan hring nun thawnthu ngaih-nawm a piang chhuak a, mi nazawng tana chhiar thiam harsa si, a chhiar thiamte tan erawh chhungril nun hausakna thlentü thawnthu ngaih-nawm a tling th̄in. Boruakah hun rei lo te atan fei chak takin a thlawk a, leiah bawk a tla th̄in angin hring nun hi hun rei lo te atan a ni. Chumi chhung chuan eng thawnthu nge kan hnutchhiah dawn le?

Hring nun chhungrihlah zawhna kan inzawh th̄in tam ber chhanna hi khawiah nge a awm tak ang le? A chhanna tur lah inang lo tak tak a ni hlawm awm si a. Vawiiin thleng hian pawn lam lang thei hian heng zawhna chhanna dik tak hi min la pe reng reng lo a nih si chuan, chin fel theih loh, chhanna awm thei lo zawhna, tawp chin nei lo thawnthu lungchhiatthlak tiin kan ti tawp mai dawn em ni? Mahse, hei hi hringfate tawpna tur leh thutlukna tur a

ni si lo. A nih leh chhanna dik chu engtin nge kan hmuh tak ang? Thlirna tlang hran hret aṅging hring nun her vel thlirin khua chuan ila, pen khatin hma lam i pan hlek teh ang. Chu tlang aṅging chuan boruak thiāng tak mai te chu hipin, thlifim nuam tak mai te chu dawng chungin hma lam i han thlir thar leh teh ang. Hun liam tate pawh dawn kirin, kan lo tlawmsan tawh ṭhin te kha han ngaihtuah kir ila, “Ka lo dawihzep em a ni!” tia inchihipui tur thawnthu ngaihnawm loh kan hnutchhiah tawh ngei ang. Chhanna hmuh theih reng, dawihzep vanga kan hmuh loh hi tam tak a awm a rinawm. Mahni nun ngei chu hmachhawna hneh tur kan nih laia, kan hmachhawn ngam lohna avanga mi dang kan puh takna te, mangannain min chim chang leh harsatna kan tawh changten hmachhawn ngam lova kan tlanchiatsan fona chuan, ṭiau chhumin kawr ruam a bawh paw chuk ang maiin nun chhungril min zim phui zo va, ni zung mawi tak lo lang tur chu hmu lo tawkin kan tlawmsan ṭhin a lo ni. Mahse, heng nun hlui chang tate hi beiseina thar min neihtir tur

chauhva dawn kir kan ni tih hre reng ang aw?

Tlai khua a lo ngui a, thlasik ṭiau chhum chuan kawr ruam leh phairuamte rawn panin, zan khaw vawt tak hnuaiyah chuan rorelin an awm reng ṭhin. Khua a lo var a, tlang kar aṅging ni zung mawi tak lo lang chuan chung chhum te chu a um bo zo a, zan khaw vawt tak chu kiangin ni eng nuam tak a lo thleng ṭhin. Heihi hring nun chu a ni. A chang chuan beidawna chhumin min tuam a, lungngaihna thla a zar a, ṭahna hi riak turin tlai lamah a lo lut thei a, zingah erawh chuan hlimna a lo thleng ṭhin. Hemi hmachhawn ngam loten hring nunah bung thar an kai ngai lo.

Ni zung eng mawi takin a thlen phak lohna ramngaw pilril tak ang maiin, an nun chu luah lum a ni ngai lo. Mal tak nia inhriain, tlawhpawh phak lohvin an thinlung an inkharkhip a, chhungril nun zawhna chhanna hmu turin an tho chhuak thei tawh ngai lo. Mahse, beidawnga indawm kun reng tura duan kan nih si loh avangin chhungril nun zawhna chhanna leh hring nun thawnthu tifamkima, khai khawmtu chu hei hi a ni: *pen khat chauh a taw* tih hi.

## Khawvel danglam zela Mizo Kristian thalai

– F. Vanlalrochana  
Zotlang, Aizawl.

**K**hawvel hmasawwna ropui tak avangin khawvel a zim sawt em em a, a inzawwna pawh a tha em em tawh. Khawvel lehlama sumdawwna pakhata buaina chu khawvel lehlama harsatna thlentü lian tak a lo ni ta zel a. Globalisation avangin hmanraw hrang hrang hman kawngah te, nun dan kawngah te, ngaihtuahnaah te khawvel chu a danglam bawih bawih tawh. Chu chuan Mizo fate pawh nasa takin min nghawng a, min run a ni, te pawh a tih theih awm e.

Globalisation avangin khawvel hi sualna inang khatin a sual rual ta thup thup a, te pawh ti ila, a awm lo chuang lo vang chu. Khawvel harsatna te chu kan harsatna a lo ni ve ta zel a, kan hriat ngai loh thil tharin kan society a rawn tibuai a, kan society ngaih dan leh thil kan hriat thar insual buai vel te pawh chuan nasa takin kan nun dan a nghawng a, a tha zawng aiin a tha lo zawngin min

nghawng thuk daih mai awm mang e, tih theih a ni.

Mahni leh mahni kan inhmangaih tual tual a, kan mihringpuite, kohhran leh khawtlangte chu kan duh leh mamawh min petu mai turah kan ngai deuh tawh a. Pathian ngei pawh, kan duh zawng tihlawhtling maitu tur ang lekah kan ngai ta!

Khawvel hi a han danglam chak khawp a, zan hnih khat thila a hmasawn chak dan te hi pui tak a ni. Chutiang khawvel chung lam leh pawn lama hmasawn chak leh danglam chak tak karah chuan Mizo Kristian thalaite hi engtin nge kan awm zel ang?

Heng thilte hi kan inngah zelna tur chu a ni ang: Pathian rin tlat, kohhrana rinawm, Bible leh lehkhabu chhiar tam, rinawm leh dik taka nun, taimak leh mi dangte nena inlaichinna tha neih. A chang chuan a hmaa kan sawite pawh kan sawi nawn leh thin ang. Heng thilte hi khawvel danglam chak taka kan vawn zel a ngai a ni.

Mizo Kristian thalaite hi thil tha duh kan ni a, Pathian thu pawh kan duh. KṚP General Conference-ah pawh ram zau tak la thei tur sipai rual ropui taka chhuak thei khawpa tam

thalai kan kal khawm thin a. Pandal chhunga thut loh hlauvin inkhawm hma darkar hnih deuhthaw ațangin pandal kan khat thup zel a, kan lo zai lawk tawh thin a. Mizo thalaite, Mizo Kristian thalaite hian finchhuahtu tha, fuihtu tha, kaihhruaitu tha hi kan mamawh mai chauh ni tein ka hre thin.

Mizoram chhungah ngei university kan nei tawh a. Lehkha thiam sang tak tak pawh kan tam ta hle. 'Pathian awm ring lotu' inti ngam hial te pawh kan awm ta! Pathian thu awih te, sakhaw zirtirna te han beih let te chu finna ni tlata hria te pawh Mizo thalaite zingah an awm ta. Mizo Kristian thalaite hian Pathian hi kan nunah a laipuiyah dah tlat ila, Amah chu i ring tlat zel ang u. Chu chu khawvela kan bo lohna tur a ni. A nih loh chuan, khawvel tuifinriat zauvah hian tuipui fawnin min la bo mai dawn a ni. LALPA Pathian hi kan vuan tlat tur a ni ang.

*Social networking site* hrang hrang a lo tam ta a, Mizo thalaite pawh hian kan hmang ve nasa ta hle. Kan duh duh kan sawi a, kan ngaih dan kan tlangaupui ve bawrh bawrh a. Heta kan sulhnu ațang te, kan nunphung

ațang tea han thlir hian lehkha kan chhiar tam tawk lo hle tih erawh a lang thei. Mihring puitling nih duh chuan a tam thei ang ber lehkha chhiara, finna hi zir tur a ni.

'Lehkha ka chhiar hman lo' tih hi sawi fo loh tur a ni. Khawvela mi buai buai ber ber, ram hruaitu mi hman hlel tak takte pawh hi an hun chep tak karah pawh lehkha chhiar hram hram thin an ni. Filmstar hlawhtling tak tak te, khawvel huap zaithiam lar tak tak te pawh hian lehkha an chhiar zau viau zel mai! TV-a an interview en te, chanchinbua an interview han chhiar te hi a manhla bik thin hle. Mihring mihrinnaa puitling tur te, ringtu puitling zawk nia thang zel tur te, rawngbawltu hlawhtling zawk nia thawh hlawk zel tur chuan a tam thei ang ber lehkha chhiar kan mamawh.

Khawvel danglam zelah hian Mizo Kristian thalaite chu Bible zirtirnaah ding nghet ila, Lal Isua duh dan zawm hram hramin kohhranah i nghet tlat ang u. Isua Krista chu eng tik lai pawhin a pangngai reng a, khawvel danglam zelah hian danglam ve ngai lo kan Lalpaah hian kan innghat tlat zel tur a ni ang.

Kan vela mite an dik loh avangin kan dik lo ve ngawt tur a ni lo. Dikna kan ñan ang a, huai takin kan ding nget tur a ni. Dikna chu a tlo ber a, a dingchang awm chhun pawh a ni ñin reng a. Thu dik a nih phawt chuan kan ñan tlat phawt mai tur a ni. Tuar a ngai a nih pawhin pa takin kan tuar ang. Chu chu Mizo tlangval nihna tur a ni a, Kristiante awm dan tur pawh a ni.

Eng ang pawhin ropui ila, eng ang pawhin lian ila, kan ropuina leh kan dinhmun ñatna te hi chatuan daih a ni lo. Zan hnih khat thilthu chauhva danglam thei a ni. A tuk zingahan thawha kan chan vek theih thil a ni. Chu vang chuan, mihring ropuina dik tak hi chu inlaichinnaah a awm a. Mizo Kristian ñhalaite chu kan ñhian te, kan kawppui te, kan chhung te lakah kan rinawm tur a ni.

Kohhran hi Krista taksa, thutak ban leh inngahna a ni a. Khawvel pawl dangte ang a ni lo. Chuti ang chuan kan ngai tur a ni hek lo. Kohhranin a tih chuan kan ñan tlat zel tur a ni. Kohhranah hian kan hnam damna pawh a awm. Pathian lam kan hawi tlata, kohhrana kan awm tlat chuan, kan hnam

hian kawng kan bo ngai lo vang. Cyprian-a chuan, "*Miin kohhran hi nua a neih theih loh chuan Pathian pawh paah a neih thei ngai lo vang,*" a lo ti a, Pathian chungte zingah, A kohhranhoah hian kan tel ve tlat tur a ni.

Thiamna lamah kan sang tual tual a. Mi tam tak chuan kohhran zirtirna te, sakhaw zirtirna te chu pawm loh luih te pawh an tum a, 'Pathian a awm lo' tia iak iak mai te pawh Mizo ñhalaite zingah ngei an lo pung ta. Khawvel thiamna lamah sang tak thleng mah se, nun kawng an bo a ni.

Keini erawh chuan Lalpa Pathian kan vuan tlat tur a ni ang. Lei leh van thil hi keini hriat chhuah zawh phak rual a ni lo. Josh Mc Dowell-a chuan, Lal Isua rin tlak a nih lohzia tar lan tumin thil a chhui vak a, Pathian rin tlak a nih lohzia tihlanna tur lehkhabu ziah a tum a ni. A tawpah chuan, Pathian rin tlakzia a hmu a, Lal Isua chu inngahna tlak a nihzia a hmu chiang ta em em zawk a. Kristian lehkhabu hmingthang tak mai, *More Than a Carpenter* tih a ziak ta zawk a ni.

America ram sipai hotu, General Lee Wallace-a chuan Lal Isua sawichhiatna leh a rin

tlak lohzia tihlan tumin thawnthu pakhat *Ben Hur* a ziaak a. A ziah zawh meuh chuan Pathian rin tlakzia leh Lal Isua chhandamna chanchin puan chhuahna thawnthu ropui takah a chhuah ta zawka ni. Ben Hur hi film-ah siam a ni a, kum 1953 khan record siamin Oscar Award 13 lai a dawng a ni.

Khawvel danglam chak tak karah hian keini chuan Lalpa Pathian hi vuan tlat ila, Ani chuan eng ang thlipui lakah pawh min hum zel dawn a ni.

Khawvel changkang takah hian thil a thleng chakin, thil thar a chhuak chak a. Ngaih dan a pungin, khawvel hmun tina mite nun dan kan hmu ve vek si a, a nuam tawl zawnga nun chak chang te chu kan nei thlin ang. Hetiang karah hian Mizo Kristian thalaite chuan, "*Lal Isua ni se, engtin nge a tih ang?*" tiin ngaihtuah hmasa zel ila, chu chuan kan ngaihtuahna leh kan thiltihte pawh hruai zel rawh se.

Kum 1990 khan America ramah chuan movement lar tak mai a awm a. "*What would Jesus do*" (WWJD) an ti a. Hei hi 1896-a Charles Sheldon-a'n 'What would Jesus do' tih novel a

ziahin a chawhphur leh a kaihhruaite an ni. Hei hi a chungka kan sawi anga thil ngaihtuahna, nun hmangtu pawl an ni. "*Lal Isua ni se engtin nge a tih ang?*" tih chu an thupui ber a ni. Kum 2010 pawh khan a film-in an siam a. Zaithiam, pastor, chanchinbu editor leh real estate lama sumdawng liante chu Lal Isua hniakhnung zui turin an intiam a. Ni tinin an thutlukna siam tur apiangah, "*Lal Isua ni se engtin nge a tih ang?*" tih an inzawt hmasa ziaha. Chutianga an thil tawn tar lanna fim chu a ni. Keini pawhin, ni tinin thutlukna kan siam dawn apiangin, kan thinrima, an kan chak chang te, zu no kan hmaa a awm chang te leh kawng tinrengah *Lal Isua ni se, engtin nge a tih ang* tih hi kan inzawt hmasa zel tur a ni ang.

Kan thu tihtawpna chu Rokunga'n a hla ropui *Aw JAA* khar nana a hman, ISUA KRISTA ROPUI NA TUR tih hi ni se. Hei hi kan nun kaihruaitu ni se ka duh hle a ni. Engkim mai hi ISUA KRISTA ROPUI-NA TURIN i ti zel ang u.

*"Lalpa a pangngai fo,  
Khawvel buainaah pawh;  
Buaina tuiyawna suanglungpui,  
Ka tan a tha Pathian hnaih chu."*

# PATHIANA INNGHAH

– Rinfela Zadeng  
G. Udayagiri, Odisha  
(Zobawk Vengthlang Branch)

*Sam 37:05. "I awm dan tur chu Lalpa chungah nghat la; Amah chu ring la, aman a ti vek ang."*



Uawi khat chu kan awmna Odisha-a hmeichhe naupang te, kum 3 mi nen kan infiam a. Hlim takin kan inchhah a, kan nui dun nasa hle. Chutia kan infiam lai chuan plastic dawhkan té chungah lawna lâm a duh ta a. Keiin dawhkan chu a leh loh nan nghet takin ka lo chelh a. Mahse, chu hmeichhe naupang chuan dawhkan ka chelh chu duh lovin a tap ta a. Hlim taka a lâmna tur daltuah min ngai a, a hlimna tur laksaktuah min ngai a ni. A nihna takah chuan dawhkan kha chelh lo ila chuan a let ang a, chhuatah khan tlain a lu sawh se, a thih phah hial mai thei.

Heti ang chiah hian kan ni tin nuna Pathian nen kan len dun hian, mihringte hi kan duh dan leh nuam kan tih danin awm kan tum fo va, kan awm fo thin. A chang phei chuan thil tha lo, Pathian min hlattira thihna hial min thlen theiah te kal/awm kan duh thin. Chuti ang hunah chuan Pathianin min chelh a, kan himna leh kan thatna tur zawkin min thunun thin. Heti ang Pathianin min thununa min chelh hian kan hre thiam lo va, kan tap a, kan vui thin. Pathian chuan min hmangaih ta lovin min kalsan ta em maw tiin kan vui hial thin. Mahse, chu chu Pathian rilru a ni hauh lo.

Pathian min hmangaihzia te, min vên nasatzia leh A ropuizia te a lan chhuahna tur chu kan duh dan ni lova Pathian duh dana kan awm chiah hian a ni. Lazara chhungte chuan Lazara damloh lai khan Lal Isua kha lo kal sela, lo tidam thuai se tih kha an duh dan leh an rilru inngahna a ni. Mahse, Lal



Isuan a thih hnua a kaihthawh khân Pathian ropuizia chu khawvelin kan hriat phah a, Lal Isua hi thawhlehnah leh nunna a nihzia Chiang takin kan hmuh phah a ni. Lalzara chhungte duh dan anga a damloh laia tihdam ni sela Pathian ropuizia hi kan hmu lo ang. Chuvangin, Pathian kut leh A duh dan zâwka mihring (Lazara chhungte) an inngah chiah khan Pathian ropuizia a lo lang chhuak a ni. Lalpa chu fakin awm rawh se.

Chuti ang bawkin Abrahamah pawh, a hmangaih leh a duat em em, a fapa Isaaka Moria tlanga Pathianin hlân tura a tih khan a mihring duh dan leh ngaih dan a ni hauh lo vang a, a rilru pawh a na hle ang tih a rinawm. Mahse, phunnawi lo leh a mihring duh dan ni lovin, Pathian duh dan zâwkin a fapa Isaaka chu halral thilhlana a pe ta a nih kha. Abrahamah'n Pathian thu a zawm chiah khan eng nge

lo thleng kha? Pathian ropuizia chu a lo lang a, mihringte chungah rilru chhia a put lohzia te, intum chawp Pathian a nihzia te a lo lang a. Jehova Jire – Lalpa tlangah ngaihtuah a ni zêl ang, tih kha Abrahamah aṅangin kan lo hriat phah zawk a ni. Amaha kan inngaha, a thu kan awih phawt chuan min ngaihtuahsak zel zawk dawn a ni tih a va lang Chiang em! Lalpa chu fakin awm rawh se! Engmi pawh ni ila, Pathian hian kan nunah hian thil ropui tak tih a duh a, a tum baw. Chu kan nuna thil ropui leh inthup chu tihlana a awm theihna tur chuan amaha kan inngah a ngai a ni. Kan duh dan ni lovin Pathian thu zel ngaichang ila, phunnawi lo leh ringhlel lovin Amahah chuan inngah tawp ila, chutah chuan Pathian ropuizia chu a lo lang ang a, keimahni tan leh mi dangte tan malsawmna thlentu, Pathian ropuizia puang chhuaktu kan lo ni ang.

## Work Camp Report :

### Tlabung Chawnpui

**R**eini Kristian Thalai Pawl Republic Veng Pastor Bial chuan Bial Conference vawu 30-na rorelah, kumin chhunga Home Mission South lama Bial hminga work camp neih kan pass a. Chumi tihlawhtling tur chuan Synod Mission Board lamah work camp neih t̄ulna hmun awmte ngaihvenin tuna Tlabung Chawnpui Bial chhunga Synod Mission School-ah work camp neih kan titlu ta a ni. Bial KTP Committee chuan October ni 26–31, 2015 chh̄ungin work camp hi neih ni se tiin a rel a ni. Work camp-a kan va thawh tur hi School Auditorium sak mek hna kal lai thawh chhunzawm a ni a.

October ni 26 (Thawhtanni) zing dar 6 rik hma hretin bus hmangin member 21 (mipa 12 & hmeichhia 9) chu Tlabung panin kan chhuak a. A tuk ni 27 (Thawhlejni) chawhma dar 11:30-ah work camp neihna hmun tur Tlabung Chawnpui Venga Mission School compound chu kan thleng a ni.

Ni 28.10.2015 (Nilaini) zing dar 6 ātangin ban khur ft. 3 biala zau, ft. 7-a thuk pathum kan lai a, chawhma dar 10 thleng thawkin, dar 10:30-ah tuk̄thuan kan ei a. Tlema khua a la lum deuh avang leh ni sa te a la nat deuh hlek avangin chhunah rei vak lo kan chaw lo a, chhun dar 12:30 vel

bawrah hna kan tan leh a, hemi ni hian ban khur 3 chu group 3-a in̄thenin kan lai zo thei a ni. Tin, thawktu quarters pakhat sak thara furniture dah tur, centre table leh reading table pakhat ve ve siam ngai chu kan zinga mistiri-ten an lo siam ve baw a. Hmeichhiaten thingpui lum leh eirawngbaw lam an buaipui t̄hin a ni. Zan lam chu kohhran inkhawm hun pangngai a ni a, tualchhung inkhawm chhimin kan inkhawm baw a, Chakma Kohhran lama inkhawm an awm baw a ni. Tin, kan kal lai hian kan kohhran mi thi an awm hlauh mai a, kan t̄hiante t̄henkhat chu inkhawm banah khawhar lenpuina lamah te an kal leh baw a ni.

Ni 29.10.2015 (Ningani) hian chawhma dar 10 vel thleng chu Tlabung lama bazar-na hun atan kan hmang a, chawhma dar 10:30 velah tuk̄thuan eiin dar 11:00 vel bawrah hna kan tan leh a. Hemi ni hian kan ban khur chawh 3 bakah khur 1 chawh sa lo awm nen, khur 4-ah ban pali kan tung a, a basement kan chhung nghal vek baw. Ban tun leh a basement chhun, rora chawh bakah hian mistiri-ten dawhkan lo siamin, nulahovin tuk̄verh frame-te rawng an lo hnawih a, nula t̄henkhatin cubic an lo thiar baw a, nilengin daihzai takin hna kan thawk thei a ni.

Ni 30.10.2015 (Zirtawpni) hian tuk̄thuan ei kham dar zing 8 vel ātangin hna kan tan leh a. Kan ban tun sa 4 chu a t̄henin tie beam kalna

tur ft. 3 vela sang theuhvin rora leh cement kan chung a, rora leh balu chhun turte a thenin kan thiar bawok a ni. Tin, hmeichhe lam pawh an kut a awol hman lo hle mai a, ei rawngbawol leh thingpui lum bakah hemi ni hian cubic rem turte an thiar leh a ni. Thing mistiri te pawhin hna zawoh ngei tumin yang takin dawhkan pahnih chu an siam bawok a, kan zinga a themthiam deuh mi pahnih/pathum velin school staff room bang pawh lam la cheh loh chu an chehsak bawok. Tin, ban phun tur pakhat chu kan phuar zo leh hman bawok a ni. Nilenga yang taka kan thawh avangin hna pawh kan thawk sawt hlein kan inhria.

### **Sikul chanchin leh hmalakna :**

Tlabung Chawnpui Bial chhunga Synod Mission School hi kan kohhranin Chakma-ho zinga rawngbawolna hmanrua a tana a din a ni a. Kum 1988 khan Tlabung Zodin-ah din tan niin, kum 1992 khan tuna a awomna hmun Tlabung Chawnpui Mission Compound-ah hian suan luh a ni ta a ni. Tunah hian sikul naupang 290 leh thawktu (Non-Teaching staff telin) mi 23 an awom meka ni. English medium school a ni a, a thawktute an yangin, kan va kal lai pawh hian sikul naupangte felfaizia leh a hmunhna felfaizia kan va hmu a ni. Thawktu missionary-te hi compound chhungah a tam zawok chu an khawsa a, pawh lamah thawktu tlem azawng khawsa an awom bawok a ni.

Chakma-ho zinga rawngbawolna tura din ni mah se, sikul naupang zingah Chakma chu a tlem zawok an ni a. Mi rethei tak tak an nih avangin tlema an lo leikan deuh chuan an nu leh pate lo lam hna puiah a tul thin avang leh, lehkha zir pawimawhna an hriat loh avang te, thingtlang lehzuala awom an nih avanga awomna tur mumal neih loh avang tein lehkha zir an bansan leh mai thin a ni. Thawktute pawhin Chakma zirlai naupang thenkhat chu an theih ang angin an awmpui bawok.

Chenna tur neih loh hi Chakma naupangte harsatna ber a nih avangin Synod hotute pawhin hostel an dingsak thei a nih chuan tun ai hian Chakma-ho zinga rawngbawolna hian hma a sawn nasa lehzuol ngei ang. Zirlaite hi kar khatah tum thum devotion neihpui thin an ni a; tin, Chakma yang thiam, Chakma Kohhrana mi Evangelist ruaiin crusade leh camping-te an buatsaih thin bawok a ni.

Ni 31.10.2015 (Inrinni) zing dar 5:20 khan sumo 3-a Tlabung chhuahsanin Aizawol lam kan pan a, zan dar 9:30-ah kan thleng leh a ni. Work camp kan neih chhunga min vengtu Pathian hnenah lawm thu kan sawi a. Home Mission South lama a tam thei ang rawngbawolna neih hi keini thalaite tan hian a tul hle a ni.

**– C. Lalruatsanga, Secretary  
KTP, Republic Veng Bial**

## **Noxa Ramthar**

**R**istian Thalai Pawl, Ramhlun Vengthar Branch chuan Silchar Mission Field chhunga Noxa Ramthar Biak In sain Noxatilla hmunah October ni 28–31, 2015 chhung khan tluang takin work camp kan nei thei a. Bus pakhat hmanga member 27 kalin Upa J.S. Hauthangan min ho a ni.

### **Kalkawng**

Ni 28 (Nilaini) zing dar 6:30-ah member 27 leh bus driver leh conductor nen Upa Zakamlovan tawngtaia min thlah zawhah kan tum ram lam panin kan chhuak. Bualpui daiyah tukthuan kan pai kan ei a, Vairengte checkgate chu chawhma dar 11:40-ah kan thleng a, hetah hian Tv. Lalruatsanga, Assistant Secretary, Noxa Ramthar Kohhrana miin min lo hmuak a, ani kaihruainain kan tlan zel a. Silchar thlen thlak hma deuhvin Tv. Lalhmangaiha leh NI. Lalnuntluangi, Evangelist Teacher, Noxatilla-a miten min lo hmuak leh a, chawhnu dar 2:30-ah Noxatilla chu kan thleng thla a ni.

### **Noxatilla leh Noxa Ramthar Kohhran chanchin**

Heng kohhran pahnihte hi Hailakandi District chhunga awm a ni a, Aizawl atangin km. 220 vela hla a ni. Cachar Tlangram Presbytery-ah awmin, tunah hian Silchar Pastor-in a bial mek a ni. Kan inngahna leh riahhmun, Noxatilla Mission Compound-ah hian Presbyterian English Medium School, K.G.–I atanga Class

IV thleng a awm a, kum tharah hian Class V thleng haton tum a ni. Biak in pakhat a awm bawk a. Thawktu hi Evangelist Teacher pariat leh nurse pakhat, an vaiin mi pakua an awm a ni. Kohhran mi 95 vel an ni a, chhungkaw 30 an ni a. Kohhran changtlung tak leh phuisui takin an ding mek a ni.

Noxa Ramthar Kohhran hi 2012-ah khan Noxatilla atanga indangin, Kohhran Upa 1 leh T.Upa 2 awmin Noxatilla atangin Pu Biaka leh NI. Lallianmawii-ten an enkawol mek a ni. Noxa Ramthar Kohhranah hian chhungkua sawmpahnih an awm a, kohhran mi zawng zawng 50 niin an zingah hnam dang chhungkua pakhat an awm ve. Noxatilla leh Noxa Ramthara kohhran mite hi a tlangpuiin Mizo hnaathlak an ni a, Hmar hnam peng, Saihriam hnam an inti a, Lusei tawng an hmang a, chutih rual chuan tawng hran chu an nei tho va, biak inah pawh Mizo tawng vek hman a ni.

### **Hnathawh chanchin**

He kan work camp-a kan zuk thawh ber chu Noxa Ramthar Biak In thar tur, a dung feet 49 leh a vang feet 24-a lian concrete-a sak a ni a, a bang hi leirawhchana rem a ni a, kawngkhar leh tukverh a la awm lo va, a chung a la awm lo bawk a. A chhungkhunga awm biak in hman lai chu a bang dap leh a chung rangva a ni a, a chhe toh hle nain inkhatom nan la hman reng a ni. He an inkhatom mekna chhuat hi biak in thar tur chhuat aia feet 2 velah a la san avangin lai hniamin leivung

*paih chhuah a ni a, hei bakah hian a kawt zawl lei pawh hi foot 1 velah niamin laih zawl vek a ni. Kan thawh tura an lo ruahman chu Pathian hruiainain tuang takin kan zo thei a ni.*

### **Hnathawh dan**

*Kan thlen tuk, ni 29 (Ningani) zing dar 6:30-ah kan riahna hmun Noxatilla atangin bus-in Noxa Ramthar hi kan pan phei a, a inkar hlat zawng hi kilometre 2 vel a ni. Tichuan, kan thlen veleh atangin kan thawk nghal a, an inkhawm mekna niin cement-a a chhuat zut a nih awangin a char hle a, a chhun kharwh pawh har tak a ni a. Chawhma dar 10-ah tukthuan ei turin Noxatilla kan pan phei leh ta a. Chawhnu lam dar 2-ah hna thawk turin kan phei leh a, dar 4 thleng kan thawk leh a. Biak in chhunga thawh ngai awm ang ang chu kan thawk zo va, zanriah ei turin kan haw phei leh ta a ni. A tuk leh Zirtawp zing dar 6:30-ah biak in kawtzawl chu foot khata hniamin kan lai leh vek a; tichuan, kan thawh tur ang ang chu dar 11 velah kan zo fel ta a ni.*

*Kan thlen zanah Noxa Ramtharah kohhranah mi pali inkhawmin, a dang zawng chu Noxatilla hmunah kan inkhawm vek a ni. Tichuan, Ningani zanah hi chuan projector ken hmangin KTP film pahnih kan chhuah a, a hmuna kohhran miten an hlutin an hlimpui hle a ni. Hetiang barok hian Zirtawp zanah pawh zan rei tak thleng film chhuahsak lehin hun kan hmang leh a ni. Haw dawn zan te a lo ni tawh barok a, film te kan chhuahsak hma hian khu laia Noxatilla-a thawktute nen*

*inkawm hona hun leh tawngtai rualna te kan hmang barok a ni.*

### **Haw kawng**

*Ni 31 (Inrinni) tukthuan ei kham dar 9-ah Pu Mafaka, Headmaster, Presbyterian English Medium School chuan tawngtaiin min thlah a, kan inngahna Noxatilla chu kan chhuahsan ta a ni. Tuang takin kan tlan a, dar 10:30-ah Silchar thleng pheiin, hun rei vak lo bazar nan kan hmang a; tichuan, dar 2:09-ah Silchar chhuahsanin Aizawl lam kan pan leh ta a ni. Harsatna leh buaina em em tawk lovin kan tlan zel a, dar 7:19 pm-ah Bualpui hotel-ah zanriah kan ei a. Zan dar 9:51-ah kan chhuahna hmun Ramhlun Sports Complex Field chu dam takin kan thleng leh ta a ni.*

*Work camp chhung hian member-te inpekna leh thawh hona a tha hle mai a. Noxatilla leh Noxa Ramthar lama thawktute min lo dawnsawna leh kaihhraina a lawmawm takzet a. Kohhran mite nen inpawhna tha tak neiin hun chep tak karah hun hlimawm tak kan hmang ho thei thin a, lawmawm kan ti hle barok. A tawp berah chuan, hetiang work camp report tur nei thei tura min lo tawngtaipuitu, in lama kohhran chungah leh mi malte chungah lawm thu kan sawi a, wawin thlenga mi tling lote khatwngaih rawngbawlhna thawh min la phalsaka, kawng tinrenga min hruiatu kan Pathian hnenah lawm thu kan sawi marolh marolh a ni e.*

**– K. Malsawmtluanga**

**Secretary**

**Ramhlun Vengthar Branch**

## SUNNA



**Tv. Hmingsangliana  
Saitual**

Tv. Hmingsangliana hi Pu Lalrammawia leh Pi Lalparliani-te fa pahnihna niin December ni 23, 1985 khan Khawlianah a lo piang a. Kum 1989 khan an chhungin Saitualah an pem a. Saitualah hian in leh lo te dinin a thih ni thleng hian an chhungkuain an cheng ta a ni.

Zai ngaina mi tak a ni a, a tleirawl chhuah aṅging Senior Department Male Voice-ah te telin Branch KṚP male voice-ah leh Kohhran Zaipawlahte pawh theih ang tawka rawngbawl ṭhin a ni. Kum 2012-a Saitual Kohhran aṅga Saitual Venglai Kohhran a indan aṅga a thih ni thleng hian Saitual Venglai Branch KṚP Committee Member niin Sunday School lamah Intermediate Department zirtirtu a ni. Kohhran Zaipawl Conductor leh Branch KṚP lamah Music Sub-Committee Secretary ni lai a ni.

Kohhran zai hruaitu niin Bial Zaipawl member a ni mek bawk. August ni 7, 2015 (Thawhṭan) zan Branch KṚP inkhawma 'Ngaihven rawh u' tih thupui hmanga a sermon chu a member-puiten a thusawi kan ngaihthlak hnuhnun ber a lo ni ta.

Tv. Hmingsangliana hi mi hlim thei tak leh taima tak a ni a. Eizawna lamah pawh mahni intodelh tum mi tak niin cement mistiri hna a thawk ṭhin a. October thla tawp lam khan Sairang lamah hnathawk turin a ṭhiante nen an kal a. An thlen thlak hnu lawk aṅging a awm a nuam lo ṭan a. Sairang damdawi inah te pawh inentirin ziaawm lam a pan hlei thei lo va, kar thum vel an awm hnuin Saitual lamah rawn haw chhovin Saitual damdawi inah zan hnih enkawl a ni a.

Hemi hnu hian Synod Hospital, Durtlangah phurh thlak a ni a, malaria leh pneumonia a ni tih hmuhchhuah a ni a. Doctor-ten theihtawp chhuaha an enkawl laiin November ni 21, 2015 zing lam dar 7 khan rawng a bawlsak ṭhin a Lalpa hnenah min lo chawhhsan ta a ni. Hemi ni chawhnu dar 2-ah Bialtu Pastor, John Raldosangan vuiin, Bial Zaipawlin amah sunna hla sain ui tak chungin kan thlah liam ta a ni.



## HRINGLANG TLÁNG

### *Mipa naupang thilpek*

*Sikul naupang pakhat hi an sikul chanchinbu zuar turin in pakhat lam panin a kal chhat chhat a. Chu in chu Chhura rual zet tur a ni ang e tih tur kharopa hlui khuk mai leh thlahrângho chen duhna ni awm taka ðhing rup mai, mi hîpna reng nei lo leh chumi vanga mi dangin an tlawh ngai loh hi a ni a. Chu in chu putar pakhat, tuallim lo zet hian a luah lum ve a, chu in chu a chhunga cheng putar nen chuan an inhmeh phian mai. Putar chuan rual a pawl ngai lo va, pawnah a chhuak khât kharop. Chu inah chuan tu mah an chuangkai ngai lo va, ðhenawm naupang harh zualho pawhin tlawh enah an en ngai lo.*

*Mipa naupang chuan ði ru takin chu in hlui zet kawngka chu a han kik kauh kauh va, an rawn hawng mai lo lehngal a. Kal sawn a tum lai takin kawngka chu an rawn hawng a, putar chuan nelawm loh zet hian, “Eng nge i duh?” a rawn ti a. Mipa naupang chuan eng mah sawi lova chu putar chu tlançhiatsan daih a duh a; mahse, chanchinbu zawrh tur a ngah si.*

*Chutah khur dar dar hian, “Chanchinbu i lei duh takin tiin kan sikul chanchinbu ka rawn zuar a,” a han ti a, a zâmna chu a thup hram hram a. Putar chuan mipa naupang chu a en vung vung a, chutih lai chuan mipa naupang chuan putarin thuk bula ui lem ker a dah tlar thliai hi a va hmu a. “Ui hi i ngaina ve a ni maw?” a han ti zui a; chu zawhna chuan putar hmêl rum tak chu a tinelawm sawt a. “Ngaina tehreng e le. Ka nei nual nghe nghe asin. Hengho chauh hi kharwela ro hlu ka neih an ni asin,” tiin a chhang a, nui hmêl a pu ve lek lek a.*

*Mipa naupang chuan putar chu mi kharwhar tak nia a hriat awangin a kharwngaih ta kharop mai a. Putar hnenah chuan, “Ui*

*chanchin ziakna lehkhabu pawh ka nei tak asin, i duh zawng tak a nih ka ring," a ti a. Putar chuan a lu a thing a, "Aih, eng mah ka duh lo. Mangtha," a ti a, kawngkhar chu a khar ta bur a.*

*Mipa naupang chu lungngai takin a kir hnak hnak a, lehkhabu a hralh thei lo chu hrehawm a ti a, putar chu amah chauhwa khawsa nia a hriat avangin a khawngaih hle barok a. An in a thlen chuan ngaih dan a nei ta. Hman kum khan a Nutei'n ui lem ker a pe a; mahse, ani chuan ui tak tak a neih avangin a lem ker chu chhuar kil khatah a dah mai mai a ni tih a hre chhuak a. Ui lem ker chu a la a, puanin a tuam a, putar chenna barok chu a pan leh ta a. Chumi tum erawh chuan rang takin putar chuan kawngka chu a rawn hawng a, mipa naupang a hmuh rual rualin putar chuan, "Nauva, eng lehkhabu mah ka lei duh lo ka tih tawh kha," a rawn ti nghal tâwng a.*

*Mipa naupang chuan, "Ka hria alawm ka pu; mahse, thil eng emaw pek tur che ka rawn keng asin," a ti a. Mipa naupang chuan a thil ken tuamna puan chu a han phelh a, putar chuan ui lem ker nalh zet mai chu a hmu ta a; a meng bial ta kawok kawok a. Mipa naupang chuan, "Hei hi Golden Retriever ngat a nih hi. Kei chuan inah pakhat ka la nei tho va, hei hi i tan ka rawn keng a ni," a ti a, ui lem ker a ken chu putar chu a pe a. Putar chu tu mahin thilpek an pe ngai lo va, a lakah tu man ngilneihna an lantîr a beisei hek lo; mahse, mipa naupang chuan a lakah ngilneihna lantîrin a thil ngainat ber a pe si.*

*Putar, a nuih avanga a hmui kau khât tak chu lawm avangin a nui hawok hawok a, mipa naupang chu a kuah a, "Bawiha, i rilru a va ropui em! Eng vangin nge ka chungah hetiang thil hi i tih le?" a ti a. Mipa naupang chuan putar chu a nuih sak a, "Ui i ngainat em wang maw le," ti ringawtin a lo chhang a.*

*Chumi ni atang chuan putar chuan tu ma pawh theih lohva a inkharkhip thinna hrui chu phelhin vantlang zingah a tel ve tan ta a, mipa naupang nen phei chuan thian tha tak an ni zui ta a. Mipa naupang chuan a ui hruaiin putar chu chawlhkâr tin an tlawh ta ziah thin barok a.*

– Jackie Sagner



HRISELNA ■■■

## Taksa vawn fai

**R**an taksaah bung hrang tam tak a awm a, a hna peng hrang hrang tha taka thawk thei tur chuan vawn fai a pawimawh a ni. Entir nan : Lu chu a balh hle chuan a lo thak a, sam te a lo thang a, a lan nalh loh bakah lu a rit a, harh lo angin min awmtir thei a, ngaihtuahna thleng pawhin a tiding lo thei thin a ni. Lu hi a khat tawka suk fai a niha, sam te khuih fai a nih chuan mi a tithothang thin ngaihtuahna pawh a ding thei thin a. Hrisel nia inhriatna pawh min pe thei a ni.

Taksa pum pawh hi chutiang baw chu a ni a. A lo balh chuan thak te, bawl te, hrehawm tihna te a lo awm thin a. Inbual fai chuan dama inhriatna, zangkhaina, thothang thatna a awm thei thin a ni. Kan taksa bal hi pawn lam atanga kan dawn chauh a ni lo va. Kan taksa chhung lam atang hian thlan angin taksa chhunga bawlhhlawh chu paih chhuah reng a ni a, a tui chu tuihuah a kal ral a, a bawlhhlawh chu taksaah kan vuna kaw te tak te awmahte a Chambang thin a. Chu vang

chuan pawn lam bawlhhlawh dawng kher lo mah ila, kan taksa hi a lo bal thuai thuai thin a ni. Kan vuna kaw te tak te te hi balin a hnawh rei phe chuan mi a tihrisel lo va, mut te a tui lo va, mut hlanin thlan chhia kan tih mai thin, thlan nasa takin a lo tla thin a ni. Chuvangin, lei laiin emaw, vaivut khu tuarin emaw kan chhuak fo lo a nih pawhin, a khat tawka inbual fai thin hi kan mamawh tho tho a ni.

Kan taksa bung hrang hrang zingah, a bik takin kan kut leh kete hi vawn fai a pawimawh a, kan ei leh in tam tak hi kuta kan khawih thin avangin, kan kut a thianghlim loh chuan bawlhhlawh leh vaivutte kan ei tel thin a. Tin hi a sei chuan tin karah bawlhhlawh a lo awm thuai thin a, tin sei chu an tin karah bawlhhlawh duk tak tak hmuh tur a awm thin hi. Bawlhhlawh hmuh tham a tang thei a nih ngai chuan an thil khawih chi hrang hrang atanga natna hrik eng emaw te chu a tang ngei ang tih a hriat theih a. Hei hi ei tur an khawih changte leh an ei changte pawhin an ei tel thin a ni. Chuvangin, hriselna atan chuan tin hi zuah sei loh ni sela, kut vawn fai ni baw chu sela, ei leh in kan khawih dawn chuan kut sil fai ni thin sela a tha a ni.

– Hriselna Lamtluang

RIMAWI ■■■

## **Mass Media-a Fakna hla hmanga rawngbawlna – Zai mite mawh leh hmasawna tur**

– R.K. Lianzuala  
Bethlehem Veng, Aizawl

(.....*chhunzawmna*)

### **Hla sak leh lan dan inmil rawh se**

Mizoten kan tlâkchham tak pakhat chu, kan thiltih leh kan lan dan a inrem lo ðhin hi a ni. Thinrim engphiar ni àwm takin, lungawi loh kawng zawh kan buatsaih a, TV-a kan lo lan chuan kan nui leh súng ðhin, kan ti tak tak lo tih a lang. Tuarna hla, chawimawina, fakna, sùna hla, inhlanna hla zawng zawng hian ziaráng a nei tur a ni. Mahse, a zai mite hian in hre vek kher lo vang a, in cameraman leh editor te, studio neitu leh kaihruaituten an hre tur a ni. Kawr sen inhmeah avanga hla tina hâk ngawt tur a ni lo. A lehlamah chuan, musical drama te a nih êm si loh chuan, Mizo thawmhnaw ni uk lo hmanga rawn inchei chu a dik si lo. Fakna hla sa

tur mipa chu a lu meh a phir lutuk tur a ni lo va, hmeichhia pawhin kan lan danah a àwm chin thliar thiam a ngai. Mithmul hrual mum vek chung a mi thinlung keh khawpa rawngbawl chu a awl lo mai thei. Hla tlar tina thawmhnaw thlâk hun lai a liam tawh. Thawmhnaw hi pawimawh mah se, thupui berah neih a ðul lo va, kawr thar 4/5 neih loh avanga music video siam thei lova in inngai a nih chuan, in rawngbawl na rilru en nawn a hun tihna a ni ang.

### **Pawisa leh a chhehvel**

Zaithiam in nih avangin tuten emaw zai turin an sawm fo che u a, lawmman te pawh siamsak in ni ðhin a, a dik a ni. Mahse, pawisa um avanga rawngbawl na remchang in hloh erawh chu a dik hauh lo ang. Pathian biak inkhawma zai tur in nih ngat phei chuan, zan khatah hmun khat aia tam chu 'aw' lo mai rawh u. Hmun khatah in 'aw' tawh a nih chuan, a dang chu a rem tawh lo. In rawngbawl na atana in pawm tawhah chuan, rilru kâk hauh lovin, Pathianin a pêk che chu a ni tih pawmin

rawng in bawl mai tur a ni. Hmun khata zai lawka, chhuah leh daih ang chi hi min an ei lo. Zai tha hle mah ula, thiam show ang lek a nih avangin eng mah a thawk tak tak lo vang.

### **Zaina tur thlang fel rawh**

Sawrkar programme leh khawvel mite zingah pawisa a tam avang ngawtin kal zel suh. Rawngbawltu i ni a, zu rui mite zingah, khawvel thil ngialngan lutukah te inlan ve zel tur i ni lo. Fakna hla sa tura i inpe tawh a nih chuan, ramri nei la, i kal lohna tur tichiang la, intheh dere suh ang che. Fakna hla chu inpêkna (commitment) nena sak chi a ni a, entertainment satliah a ni ve lo. Kan fakna hla satu, zai mite hi Anthurium Festival leh Chapchar Kût tih velah hmuh fo che u kan duh lo. Hetiang hmunah hian Pathian chawimawi a rem lo, Gospel music chu a hran daih a ni. Izahawm loh chuan, pawisa nei t̄euh mah la, ngaihsan i hlawh chuang lo vang. I zaina tur apiangah t̄lai ngai suh. Nangmah avanga an programme a khawt̄lai a nih p̄hei chuan, i mark k̄ha a zatvein a

tlahniam daih tawh a, chu bâkah i CD, pendrive leh i hmanraw pawimawh, play theih loh tih vel a awm p̄hei chuan i rawngbawlnate an buai fe ang a, i tan pawh a zahthlak hle thei ang.

### **Mi tih dan apiangin tih tum suh**

Hman deuhvah khan music video apiangah in chhunga teak step a lang em maw tih tur a ni. Biak in chung te, lui leh tui luang ilo lan tam em em lai a awm a, ramhnua i a ni leh a, tunah hian drone camera kan chelek leh ta em ni? Kan zai, Youtube-a hlan kan uar bawka, a chhe vek hauh lo. Mahse, mahni hi mahni nih ngam a tha khawp mai. Mi thenkhat min hrilh danin, zaithiamte hian in hla hi hit viau vek se in duh a, chumi beisei chuan uluk takin in thlang a, theihtawpin in inbuatsaih a; mahse, beisei ang a nih loh chang a awm thei. Chutiang a lo nih palh tum chuan, engtin emaw, tihlar hram dan ngaihtuah chiam ai chuan, Pathianin a tawka a ti rih a ni ang e, ti mai thei ula a tha khawp mai. Thuhriltute pawhin sermon ropui tak an

sawi ziah lem lo. Kan hlawh-chham deuh cháng a lo awm a nih pawhin, mahni tih dan dana kawng zawn vak ai chuan nasa lehzuala tawng-taia Pathian aw ngaihthlak leh phawt a t̄ha zawk. Mahni intibil vek khawpa chêt vel hi a t̄ha lem lo. Cheng sang tam tak sénga video kan siam, a hlawhtlin hram dan zawnga youtube-a kan dah vak vak hian, a duh duhin a thlawnin an download a, a hralh leh a zuartu pangngaiten harsatna an tâwk leh a, kan indap kualna lamah kan intlawh ping vek thei tih hriat tel a t̄ha. Pathian malsawm tlâkin inbuatsaih la, i zai kha t̄ha phawt mai se; chuti chung pawha beisei ang a lo ni lo deuh a nih pawhin, a tâwk rihah ngai mai zawk rawh.

### **In kohhranah nghet la, t̄angkai rawh**

Khawi veng leh kohhrana mi pawh ni ula, in lawina kohhranah in nghetin in t̄angkai tur a ni. K̄TP leh kohhran rawngbawlnaah te, inkhawm leh engkimah, in phâk ang tâwka in t̄angkai loh chuan a fel lo hle ang. Revival Speaker te meuh pawh, rawngbawla an chhuah loh laia mahni kohhrana

inkhawm ngai mang lo an sawi t̄hin a, a zia lo hle mai. Hla taka miten an fak in an chawimawi che u a, hmun leh hmuna miten an ngainêp si che u a nih chuan a letling hle ang a, zahna in tawng zauh zauh ang. Hla taka miten in kohhran mite hnenah an fak ang che a, in kohhrana miten hlim takin, "Kan nula/tlangval hi kan chhuang ve khawp asin," an ti thei tur che u a ni. Chuti ni lova, "Nia...ani hi...tual-chhung kohhranah chuan a vâng khawp a...." an tih fân raih raih chuan a dik tawh lo tawp tihna a ni mai.

### **T̄ial hmasak tum suh**


Hei hi ka ngai pawimawh ve hle a, Facebook-ah tun hnai lawkah ka ziak nghe nghe. Rawngbawlna thila kan inhman dawn hian thlarau lam inbuatsaihna te leh thil pawimawh tam tak a awm ngei a; mahse, a bikin thusawi leh zaia rawngbawlna lamah hian, mihring mit hmuha mawi kan tum lutuk, hmuh theih thil kan buaipui lutuk fo hian kan rawngbawlna hi a tibil nasa niin ka hmu. Davida'n Goliatha a beih dawn khan Saula khan dár

lukhum, awmphaw leh khandaihin a thumap mai a, chumi hnua Davida chhanna chu, "Ka kalpui thei dawn hauh lo mai, hetiang hian ka la tichhin ngai lo a ni," tih a ni (1 Sam. 17:39).

Goliatha lah kha tawng ruk leh khápa sáng, dar lukhum khum, áwmphaw, dar sekel sangngaa rit inbel, a ngalah dar ngal phaw, a hnungzangah dar fei, a fei ngul themkawl ang, a fei lu pawh thir sekel zaruka rit a ni rup mai si a, Saula ngaih dan kha àwm ve tak tho a ni. Nimahsela, Davida'n engkim a han inbel ve khan a che thei miah lo. Hetiang deuh bawh hian Mosia'n Tuipui Sen a vuak chah dawn khan a tiang pangngai tẽ kha a iai lo va, a sit lo va, a aia lian leh khauh ðha zawk a zawng lo. Lalpa chuan hmanraw tláwm hmangin hna ropui a thawk mai a ni zawk. A'n hman dawn chiah pawh khan Davida virvawm leh ðialungte kha a ðhang thut lo va, Mosia tiang kha a ðialin a lian thut hek lo. Heta ðang hian zir tur kan nei lo maw?

Faktea'n ropui taka rawng a bawl lai khan kamis bán bül a ha mai a, dar 11-a inkhawm ðan tur kha zing dar 4/5-ah ðhutna a khat tho asin. Kan zai miten an music video-a hla tlar tin deuhthawa an kawr leh a chhehvel thlák an intihhmuh lai khan Ruot-mawii, pal awngrawp tawh lam bul phaitual hnima a ðhu thluang ringawt khan Mizo mipui a hneh a; Zadaula, Farkawn khaw putar mitdel rawngbawl na avang hian mi tam tak seng khâwmin an awm asin.

Rawngbawltu tam tak hian ðial hmasak kan tum lutuk fo va, àwm ve taka lan tumna lamah ðhahnem kan ngai lutuk fo. A chang chuan hengte hi kan rawngbawl na tihriamtu aiin a tibiltu, Davida'n, "Ka che thei ta hauh lo mai," a tih chhan ang kha a ni fo. Kan thawmhnaw, kan thil neih, kan engkim mai hi àwm ve tak ni hmasa se kan duh tlat a, thlarau lam malsawmna aiin chu chu kan ûm ðhin a nih hi. Thianghlimna leh Lalpa ðihna takzet hi rawngbawl na hlawh-tilinna chu a ni zawk si a.



# KANTU

## Kawrtethawveng Branch

**K**awrtethawveng Branch hi August ni 5, 1954 khan din a ni a, Kawrtethawveng Pastor Bial chhunga Branch lian ber (Station Branch) niin a khaipa ber an ni. Kumin 2016 hian member 267 (Mipa 156 leh hmeichhia 111) an awm mek. August ni 5, 2014 khan Diamond Jubilee ropui takin an lawm a ni. Branch Committee member hi 19, OB 6, Committee 10, Koh-hran Committee aiawh 2, Ex-Officio – Bialtu Pastor ) an awm a. Thla tin Ningani hnukung ber zana Branch committee an thu thin a ni. Sub-committee hrang hrang pali – Programme, Evangelical, Reception, Refreshment-te din a ni. Tin, May ni 29, 1988 atang khan mei mit lovin 'KTP Eng' tih hming puin vawin thlengin Branch hian chanchinbu a la chhuah reng a ni.

Branch tihchak nan Group thumah an inthen a, Thuthlung Hluia zawlnei pathumte hming chawin – Joela, Amosa, Hosea tihte Group hmingah an hmang a ni. Group Budget te neiin thla tin Thawhtanni tawp ber zan inkhawmah hian Group Budget chhun thin a ni a, Kumin chung atan Group Budget atan Rs. 10,000/- ruahman a ni. Group inelna buatsaih thin a ni a, Thawhtan zan inkhawm, Branch hnatlang, Nilai zan inkhawm, Inrinni zan inkhawm, Pathianni chawhnu leh Tawngtai Inkhawmahte an inchhiar thin a, Branch-in an hlawkpui hle a ni.

Tunah hian Branch-in SMB hnuaiyah missionary pali an chawm mek a. Tin, an Branch atangin tunah hian SMB hnuaiyah missionary

pahnih an chhuak mek bawk. An Branch aṅang hian Pastor leh Kohhran Upa ṭhahnem tham tak an lo chhuak tawh a, KṭP thiltum tihlawhtling tura hmalakna kawngah, kohhran kutke ni tura ṭhalaite buatsaih tihah hian Kohhran Zaipawl tan theihpatawpin hruaitute leh member-ten hma an la ṭhin a. Inkhawm programme-ahte hian solfa lama hma an sawn theihna tur tein ṭan lak ṭhin a ni. Evangelical sub-committee hmalaknain Thawhṭan zan inkhawm banah thupui neia ṭawngṭai rual ṭhin a ni a, Member in tinah chhung inkhawm neih thin a ni bawk.

Sunday School banah ṭawngṭai Inkhawm neih ṭhin a ni a, hetah hian thupui thlan sa leh thlan chawp hmangtein ṭawngṭai hona leh ngaihtuah

zawng sawina hun te, zai hona hun te an hmang thin. Faith Promise, Group Budget, Lei laih, Poly pot-a lei thun, huan sam te leh inhlawhna hrang hrang an neih ṭhinte hi an Branch sum hnar ber a ni.

Central KṭP aṅanga tih tur lo kal angte hi an phak ang tawkah tihlawhtlin hram an tum ṭhin a. Kristian ṭhalai chanchinbu hi kumin hian copy 42 an la mek a ni.

KṭP Day-ah hian khawtlang tana an tih theih ang angte tiin an hnatlang ṭhin. Thawhṭan zan inkhawm dan tlangpui: Sermon, Short sermon, Fellowship, Group Nite, Evangelical Nite, Ngaihtuah sawi, Hla duh zawng thlan, Group Sharing, Booklet zir ho leh member-ten an sawt tlan theih tur tein hun an hmang ṭhin a ni.



# Keimahni



■ **CHAMPHAI** : January ni 15-16, 2016 khan KṮP General Conference vawi 56-na Organizing Committee min ngen angin pandal, seat arrangement, transport, hospitality, sound leh video coverage lam enpui turin CKṮP aṯangin Pu Samuel Laldingliana (Asst. Leader), Pu C. Laldingliana, Pu Nguhmingliana leh T.Upa Lalthangvunga Sailote an kal a, Synfo aṯangin mi 3 leh Active Sound aiawh mi 1 an kal tel baw. Ogranizing Committee leh Sub-Committee hrang hrangte nen inkawmin Conference pandal te an thlir ho va, hma lak zel dan tur te an sawi ho.

■ **SELAM BRANCH** : January ni 18-21, 2016 khan KṮP, Selam Branch Diamond Jubilee hmanpuiin Upa Richard B. Lalhriatpua a kal a, January 20 zanah thuchah a sawi a, inkhawm ban Praise & Worship a kaihruai baw.

■ **LAWNGTLAI CHANMARI BIAL** : January ni 22-24, 2016 khan Lawngtlai Chanmari Bial Conference chu Khawmawi Vengthar Kohhranah nghah a ni a, Pu Samuel Laldingliana (Asst. Leader) leh Pu Lalchhuanliana-ten an hmanpui. Inrinni zan leh Pathianni chawhnu inkhawmah Pu Lalchhuanlian an thu a sawi a, Pathianni chawhma leh zan inkhawmah Pu Samuel Laldinglian a sawi. Soloist Ni. Lalṯhakimi, Electric Vengin a ṯawiawm a, vawi 5 din chhuahah hla 5 a sa. Kal lamin, Zirtawp zanah Chanmari Bial (Lunglei) Conference an hmanpui baw.

■ **HORTOKI BIAL** : Hortoki Bial Conference (Jan. 22-24, 2016), Hortoki Gilgal Kohhrana nghah chu Dr. Julie Remsangpuii (Treasurer), T.Upa T. Lalawmpuia leh Pu Zonunsanga Ralte-ten an hmanpui a. Conference thupui 'Isua hmuh kan duh e' (Joh. 12:21) tih chu Pathianni chawhma inkhawmah Dr. Julie Remsangpuiin a sawi a, chawhnu leh zan inkhawmah T.Upa T. Lalawmpui an a sawi baw. Pathianni zan inkhawm ban Fellowship-ah Pu Zonunsanga Raltein thu tawi a sawi.



■ **DARLAWN BIAL** : Darlawn Bial KṮP Conference vawi 47-na, (Jan. 22-24, 2016) Darlawn Chhim Veng Kohhran Biak Ina neihah Dr. Lalliansanga, Asst. Secy. leh Pu K. Lalruatpuia-te an kal a, Inrinni chawhnu rorel zawhah Bial Committee nen an inkawm ho. Thupui – ‘Thlarau Nun’ (Gal. 5:25) tih chu Pathianni chawhma inkhawmah Dr. Lalliansangan sawiin, chawhnu inkhawmah Pu K. Lalruatpuian a sawi bawk.

■ **TUIPANG BIAL** : Tuipang Bial Conference (Jan. 22-24, 2016), Tuipang Kohhrana nghah chu Pu R. Lalruatkima leh T.Upa Lalthangvunga Sailoten an hmanpui a. Thupui chu ‘Pathian nung biak in’ (2 Kor. 6:16) tih a ni a, Inrinni zan leh Pathianni chawhnuah Pu R. Lalruatkiman a sawi a, Pathianni chawhma inkhawmah T.Upa Lalthangvunga Sailovin a sawi bawk.

■ **KHAWLAILUNG DINTHAR BIAL** : Khawlailung Dinthar Bial Conference (Jan. 22-24, 2016) Sialsir Kohhrana neih hmanpuiin Pu C. Laldingliana, Pu Vanlalpeka leh Pu P.C. Biakmuanpuia-te an kal a. Thupui, ‘Lalpa nghak rawh’ (Sam 37:7) tih chu Inrinni zana Pu Vanlalpekan a sawi a, Pathianni chawhmaah Pu C. Laldinglianan sawiin, Pathianni chawhnuah Pu P.C. Biakmuanpuian a sawi bawk. Pathianni chawhnu inkhawm banah CKṮP hruaitute kawmna hun an buatsaih.

■ **HLIMEN BIAL** : Hlimen Bial Conference & Golden Jubilee lawmna (Jan. 23, 2016) chu Upa Zonunmawia (Gen. Secy.) leh Pu Ngruhmingliana-ten an hmanpui a. Inrinniah jubilee ruai theh a ni a, zana Upa Zonunmawian thuchah a sawi a, Pu Ngruhminglianan thilpek a hlan.

■ **UNITY IN DIVERSITY PROGRAMME** : January ni 27, 2016 khan People Living with HIV/AIDS (PLHIV), Light of Hope Ministry, Agapia Social Centre, World Vision Care India Mizoram te leh Namkwang Church Youth Team of South Korea-te buatsaih ‘Unity in Diversity-cum-Advocacy with Stakeholders’ programme, Synod Conference Centre-a tel tura min sawm angin Leader Rev. J. Lalremsiana a tel. Leader hi Pro. Pastor Malakia Lalnunfela (Durtlang)-in a ṽawiam a ni.

■ **UPA ATANA THLAN** : January ni 17, 2016 (Pathianni) khan kan rawngbawlpui, Pu Samuel Laldingliana chu Electric Veng Kohhran Upa atan thlan a ni.

## SYNOD CHOIR RAWNGBAWLNA

1. **KEIFANG KOHHRAN** : *November ni 28, 2015 khan Keifang Kohhran Biak In thar hawnnaah an zai a, ÷um 2 din chhuahah hla 4 an rem.*
2. **TUIKUAL KOHHRAN BIAK IN** : *December ni 8 (Thawhlehan) & 13 (Pathianni zan), 2015 khan Synod Inkhawmpui varwi 97-na, Tuikual Kohhran Biak Ina nghahah an zai a, ÷um 2 dinah hla 3 an rem.*
3. **A.R. GROUND** : *December 22, 2015 zan khan Mizo Theological Association (MTA) buatsaih Unity Carol Service, A.R. Lammual, Aizawla Unity Choir-ah an tel.*
4. **VANGCHHE KOHHRAN** : *January ni 9-10, 2016 khan Vangchhe Kohhran Centenary lawmnaah an zai a, ÷um 4 din chhuahah hla 9 an rem. Vangchhia hi rawngbawla an chhuah ÷um 82-na a ni.*

### CENTRAL K.Ṭ.P. HRUAITUTE, 2014-2016

#### Office Bearer-te

Leader	:	Rev. J. Lalremsiamia	9862669230
Assiatant Leader	:	Pu Samuel Laldingliana	9436198740
General Secretary	:	Upa Zonunmawia	9436152024
Assistant Secretary	:	Dr. Lalliansanga	9612241873
Treasurer	:	Dr. Julie Remsangpuii	9436142235
Finance Secretary	:	T.Upa R. Lalramnghaka	9436351374

#### Committee Member-te

Pu R. Lalruatkima	9436360571	Upa Richard B. Lalhriatpuia	8974287347
Pu C. Laldingliana	9436140834	Upa K. Rorelkima	9436153444
T.Upa Lalthangyunga Sailo	9862381275	Pu V. Lalrinmawia	9436153286
T.Upa T. Lalawmpuia	9436366519	Pu Nгурhmingliana	9436374104
Tv. Joseph Lalsangzuala	9436152063	Pu Vanlalpeka	9436153728
Pu Lalchhuanliana	9862364583	Pu K. Lalruatpuia	9862577177
Pu P.C. Biakmuanpuia	9436374833	Pu Zonunsanga Ralte	9402113038
T.Upa Lalmuanpuia	9436142398		

#### Ex-Officio Member-te

Rev. H. Lalrinmawia	-	Synod Moderator
Upa H. Ronghaka	-	Synod Secretary (Sr.)
Rev. B. Sangthanga	-	Executive Secretary i/c KṬP





Bial KTP Conference - Khawllailung Dinthar Bial



Work Camp - Republic Bial KTP



Work Camp - Ramhlun Vengthar Branch



### KTP EMBLEM LEH FLAG CHUNGCHANG

Bial leh Branch hrang hrangah KTP Emblem hi mahni duh dana lo tidanglam (modify) a, hmang zui ta zel kan awm tak nual avangin Central KTP chuan Emblem hman tur dik tak inpek thar leh thain a hria a. Bial leh Branch tin ten heta tarlan ang hi hmang theuh tura beisei kan ni. A lem (picture) hi a inthawn theih loh avangin heta download link atang hian a thei thei chuan lo download ni sela, Central KTP Office atangin a soft copy lak theih a ni ang.

Download Link: <https://drive.google.com/folderview...>

Bial leh Branch KTP Flag siamtir duhte tan a hnuai tarlanah hian ₹ 500/-in siamtir theih a ni ta a. Bial/Branch hming ziah man ₹ 100/- a ngai bawk.

**LA Graphic**, Chanmari YMA Hall hnuai  
Prop: Chhuan tea, Ph: 9774395219



**Kantu - Kawrthawveng Branch**